



Xueves, 2 de xunu del 2016

INTERVENCIÓN DEL PRESIDENTE DEL PRINCIPÁU D'ASTURIES, JAVIER FERNÁNDEZ

Inauguración de la 53 Feria de Muestres d'A Veiga

Esta tarde inauguramos la quincuaxésima tercer edición de la Feria de Muestres. Con independencia de que pronunciar l'ordinal resulte un tanto traballíngües, sumar más de mediu sieglu de certames resulta yá un ésitu. Norabona.

Nada menos que 53 ediciones, colo qu'eso supón. Pero convién valorar el porqué de les coses. Como s'encamienta a los estudiantes, nun basta con memorizar los enunciaos; tamién hai que razonalos. Aplicáu al casu, ¿qué razones xustifiquen la trayectoria y afitamientu d'esta Feria de Muestres? Pienso en delles. Una pue ser la tradición, que tien la so inercia acumulativa: yá sabemos que la fuerza de la costume tamién posa. Otra, les instalaciones, escelentes: un pabellón comercial cubiertu de más de 3.000 metros cuadraos y una escampada exterior amplia d'otros 24.000 metros. A lo último, añedamos tamién la xeografía, nuna frontera que la convierte n'encruz de caminos, el clima y hasta la gastronomía. Seguro que toes eses causes confluyen a favor del trunfu d'esti certame.

Pero too eso, con ser importante, nun bastaría. Les tradiciones escaécense o decaen, les instalaciones puen convertise en fierro y bien de veces el tiempu nun ayuda, anque güei tengamos fortuna. Como en cualesquier otra obra de los homes, equí hai que buscar el factor humanu: l'inxeniu, el talentu y la voluntá de los veigueños ye, a lo último, el qu'esplica la fuerza d'esti alcuentru. Alcalde, yá ves que tengo otru motivu pa date la norabona.

Precisamente a esi talentu hai qu'atribuyir qu'esta edición de la feria se dedique al agroturismu. Va 31 años que la nuestra comunidá autónoma s'identificó col lema «Asturies paraísu natural»; pasaron tamién tres décadas desde l'hotel La Rectoral abrió les sos ventanes a esi paraísu nel vecín conceyu de Taramundi. Toos ustedes saben que de magar, dende esos episodios xerminales, el turismu rural desenvolvióse enforma, tanto n'Asturies como en Galicia y tola España verde.



Cuando se dieron aquellos primeros impulsos, hubo un erru xeneralizáu de minusvaloración: pensábase qu'aquello daría bien poco de sigu. Los fechos demostraron xusto lo contrario. Anguaño, el turismu rural supón el 21 % de la ufierta d'agospiamientos nel Principáu. Falamos, son datos de va pocos meses, de 18.177 places en 1.852 establecimientos. Son datos elocuentes d'un aciertu.

Con eses, güei cometeríamos otu erru si pensáramos qu'en cuestión de turismu ta too fecho. Por eso ta perbién escoyida la temática d'esti certame. L'agroturismu, que dexa'l contactu directu coles actividaes tradicionales del ambiente rural, ye una modalidá en puxanza que ta captando cada vez más demanda y algamó cuotes importantes n'otros países europeos; una modalidá na qu'A Veiga y toa esta comarca —la integrada na reserva de la biosfera del ríu Eo, Ozcos y Terras de Burón— va tener muncho que dicir y muncho protagonismu que ganar, porque cunta con ventayes naturales pa liderar el so desenvolvimientu. Recuerdo nesti sentíu que la declaración de reserva de la biosfera foi promovida a comuña polos gobiernos de Galicia y Asturias y mereció'l refrendu por unanimidá de la Unesco. Ye una cooperación que tenemos de caltener y estender a otros asuntos d'interés común, como la promoción de les rutes del Camín de Santiago.

Quiero facer una intervención curtia, porque lo importante güei nun son les mios palabres, sinón la puesta en marcha de la feria. Sicasí, hai cuestiones nes que quiero incidir. N'Asturies, n'España y en cualesquier otu país, les polítiques de caltenimientu del territoriu siempre son revesoses. Digamos qu'esisten dos polos en tensión: unu, l'intervencionista que s'empeña en regulalo too cola lletra de normes y reglamentos; otu, el productivista, el que considera que la meyor opción ye dexar cancha llibre a la esplotación del territoriu. Simplifico enforma, pero creo que se m'entiende perfectamente. Con eses, a quien busca l'equilibriu ente dambos planteamientos asocéde-y de cutiu como'l que media nun discutiniu, qu'acaba llevando de toes partes.

Y yo, sicasí, sostengo qu'una Alministración —nesti casu, la del Principáu d'Asturies— ta obligada a buscar esi equilibriu. Nun digo equidistancia, que ye una cuestión distinta: l'equidistante refuga tomar partíu, prefier nun moyase, y sicasí yo falo d'un gobiernu responsable que ta decidíu a conxugar la preservación col aprovechamientu y el desenvolvimientu.

Les zones naturales nun pueden ser caricaturizaes como un gulag nin una reserva: son protexíes porque tienen valores especiales, y esos valores especiales tienen que servir, al empar, de plataforma pal so desenvolvimientu. En toa xestión pueden cometese erros, inclusive fallos d'importancia, pero la desllexitimación sistemática, la crítica destructiva a les polítiques de protección del mediu ye una irresponsabilidá que, de trunfar, acabaría volviéndose contra'l mesmu territoriu y contra quien lo habiten. El retrocesu nunca ye una opción.



Gracies a faer les coses bien, ensin vencer a quien afalaben la so esplotación urbanística esmadrada, la mariña cantábrica que tamién caracteriza a esta contorna ye la mariña meyor caltenía d'España. Les cuenques del Eo, del Navia y del Porcia vertebran como costellames esti territoriu, d'una guapura natural que ye quiciabes el so principal recursu. Veis que too suma. Por eso digo que la protección bien entendida nunca tien de ser aplicada nin considerada como un frenu, sinón como un motor pal mesmu desenvolvimientu. La promoción del agroturismu encaxa perfectamente nesi planteamientu. Asegúrovos que'l Gobiernu d'Asturies va tar sollerte a les iniciatives que proponzáis para, na midida de lo posible, contribuyir a la so meyora. Repito qu'en materia de turismu queda muncho por faer y tamos dispuestos a faelo.

Empiecen cuatro xornaes de feria. El programa incluye numerosos actividaes, la mayoría bien curioses. Quiciabes la más aburrida de toes sía precisamente esti actu inaugural. Ye una razón bien bona pa nun quitar más tiempu. Deseo que'l certame sía un ésitu, como tantes ediciones anteriores, y espero que d'equí surdan bones iniciatives que fomenten el desenvolvimientu d'A Veiga y de toa esta contorna.

Declaro inaugurada la quincuaxésima tercer edición de la Feria de Muestres d'A Veiga.

Munches gracies.